

## CAPUT III.

## De Confirmatione:

173 Q. 1. *Quid ad hoc Sacramentum conferre possit, & debeat Pastor?* R. tametsi ejus minister non sit; curare tamen debet, ut subditi hoc Sacramentum debite cognoscant, aestiment, & se ejus participes efficiant. Unde Catechismus Rom. c. 3. *Si in Confirmationis Sacramento explicando Pastorum diligentia unquam requirenda fuit; nunc cerè opus est quàm maximè illustrare, cum in sancta DEI Ecclesia hoc Sacramentum à multis omnino præmittatur: paucissimi verò sint, qui divina gratiæ fructus, quem deberent, ex eo capere studeant.* Hæc explanatio autem, ut idem Catechismus indicat, sicut alijs quoque diebus, ità præsertim die Pentecostes, quo præcipuè administrari solet, instituenda est.

174 Q. 2. *Quid potissimum circa Sacramentum hoc declarari oporteat?* R. conformiter eidem Catechismo. 1. quòd verum sit novæ legis Sacramentum. 2. Quòd exinde dicatur Sacramentum *Confirmationis*, quia confirmat, & roborat, & baptizatum veluti militem Christi efficit. Ubi adduci potest exemplum Apostolorum, qui ante, & in passione Christi infirmi, & debiles, die Pentecostes Spiritus sancti virtute roborati summè ardua, & mortem ipsam audacter, & liberè superarunt. 3. Quid *oleum*, quo confirmatus ungitur, quidve *balsamum* admixtum si-

gnificet : videlicet per *oleum* significari gratiæ plenitudinem, per *balsamum* verò virtutum suavitatem, ita ut confirmati dicere possint : *Christi bonus odor factus.* 2. Cor. 1. v. 15. 4. Quomodo oleum & balsamum specialem hanc vim per Episcopi consecrationem accipiat. 5. Quid per verba formæ indicetur. 6. Quàm dignum sit hoc Sacramentum, eò quòd conferri nequeat, nisi ab Episcopo. 7. Qui, & quales Patrini adhibendi, & quæ cognatio contrahatur. 8. Quomodo debeat, ut Sacramentum hoc non priùs, nisi post adeptum rationis usum suscipiatur. 9. Quòd ratione præditi exacta confessio sit præmittenda. 10. Declarandum est, quomodo confirmandus in Confirmatione ipsa gerere se debet. 11. Quis inunctio frontis significet, videlicet, ut confirmatus nullo metu, aut verecundiâ à Christiani nominis confessione deterreatur. 12. Cur Episcopus alapam infringat, videlicet in signum, quòd confirmatus paratus esse debeat ad omnia adversa invicto animo pro Christo perferenda. 13. Cur Episcopus pacem confirmato imprecetur, videlicet in signum, quòd confirmatus gratiæ Cælestis plenitudinem, & pacem, *qua exuperat omnem sensum* ad Phil. 4. v. 7. contentus sit.